

Այդ երեկոյ բոլոր տները փոխինդ են ուտում: Այդ պատ-
րաստում են բոված և երկանքով աղացած ցորենի ալիւ-
րից, որը շիրայով են շաղախում: Փոխնդի ալիւրից միքիչ
ամանով դնում են իրենց տան ալիւրի փեթակների վրայ,
որպէսզի Ս. Սարգիսը գիշերը ձիով անցնի փոխինդի վրայով,
որ տներում «բարաքեաթ» լինի: Այնուհետեւ, Շաբաթ առա-
ւօտեան բոլորը դնում են եկեղեցի, ուր պատարագից յետոյ
հաղորդւում և ապա տուն վերադառնալով՝ ուտում են մա-
տաղի մսից պատրաստած հարիսէն: Ահա այսպէս է տօն-
ւում Ս. Սարգիսը:

Ս. Վարդանանց տօնը: Պատմական այս տօնը գիւղե-
րում չի տօնւում:

Բարեկենդան: Բարեկենդանի ամբողջ շաբաթը, նամա-
նաւանդ վերջին երեք օրը միմեանց մօտ հաւաքւելով թէ
շատ ուրախ անցկացնում, զւարճանում են և թէ լաւ և
իւղարից կերակուրներ են ուտում: Բացի այդ, գիւղացի կրտ-
րիճները դուրս են գալիս դաշտը ձիարշաւ և այլ խաղեր են
սարքում:

Ընդհանրապէս հարսանիքներից շատերը բարեկենդանին
են կատարւում:

Մեծ պաւս: Մեծ պաւսին Փէրիացիք ասում են «Աղուհաց»:
Պաւս բռնելու և առհասարակ միմեանց այցելելու և «Աղու-
հաց»-ը շնորհաւորելու սովորութիւնը գիւղերում դեռ կա-
տարւում է բոլոր ճշտութեամբ: Գիւղացիք այդ օրը հաւաք-
ւում են միմեանց տուն, շնորհաւորում «Աղուհաց»-ը, ու-
տում, խմում, քէֆ անում, պաւս սկսելով ու «Լւացարուք
— սրբացարուք»-ի հանդէսը կատարելով:

Ընդհանրապէս պաւսի Երկուշաբթի առաւօտեան վաղ՝ գի-
շերադանգին հարսները վեր են կենում և կուծն ուսելով շտա-
պում են դէպի աղբիւրը կամ գետը ջուր բերելու, որպէսզի
տանը «բարաքեաթ» լինի և այդ տարւայ հունձքն առատ լինի:
Իսկ նոյն օրը ջահէլ հարսներն ու աղջիկները համախմբւում են
աղբիւրի շուրջ և այնտեղ միմեանց շնորհաւորում պաւսը:—